



SIARAN AKHBAR

PELANJUTAN LANGKAH-LANGKAH INTERIM SEKTOR PERBANKAN

1. Autoriti Monetari Brunei Darussalam (AMBD), dengan perundingan bersama industri perbankan, ingin memaklumkan pelanjutan pemberian bantuan kepada pelanggan perbankan, iaitu peniaga-peniaga dan individu-individu yang terkesan akibat wabak COVID-19 selama tempoh enam (6) bulan lagi [1hb April 2021 – 30hb September 2021].
2. Sejak bulan April 2020, bank-bank dan syarikat-syarikat kewangan telah menawarkan beberapa jenis bantuan bagi meringankan kesulitan kewangan yang dihadapi oleh peminjam. Setakat bulan Disember 2020, sebanyak 2,014 permohonan telah diberikan bantuan di mana sebilangan besar telah memilih bantuan berbentuk penangguhan pembayaran balik pinjaman/pembiayaan buat sementara waktu [temporary *deferment*]. Bantuan ini telah mansuh pada 31hb Mac 2021.
3. Dalam tempoh berkenaan, bantuan tersebut telah membantu meringankan tekanan kewangan pelanggan yang terkesan diakibatkan oleh wabak COVID-19. Dengan pemulihan aktiviti perekonomian dan acara-acara sosial, sebilangan pelanggan tidak lagi memerlukan bantuan tersebut dan telah meneruskan pembayaran kemudahan pinjaman/pembiayaan mereka secara penuh. Walau bagaimanapun, AMBD mengambilmaklum bahawa sebilangan pelanggan akan masih menghadapi masalah aliran tunai dan memerlukan lebih masa sebelum mereka dapat meneruskan pembayaran kemudahan pinjaman/pembiayaan mereka secara penuh. Bagi sebilangan pelanggan, penyelesaian pinjaman/pembiayaan alternatif mungkin akan diperlukan.
4. Sepanjang tempoh lanjutan ini, AMBD akan memberikan kelonggaran kepada beberapa peraturan perbankan bagi menggalakkan bank-bank dan syarikat-syarikat kewangan untuk menawarkan bantuan yang bersesuaian kepada peminjam yang masih terkesan melalui pilihan-pilihan berikut:
 - a. Penangguhan pembayaran balik kemudahan pinjaman/pembiayaan;
 - b. Menstruktur semula kemudahan pinjaman/pembiayaan peribadi dan kemudahan sewa beli seperti pembiayaan kenderaan selama tempoh tidak melebihi 10 tahun;
 - c. Penukaran baki kad kredit kepada pinjaman/pembiayaan berjangka pendek (*term loan*) selama tempoh tidak melebihi tiga (3) tahun bagi individu-individu yang terkesan di sektor swasta sahaja termasuk mereka yang bekerja sendiri (*self-employed*); dan
 - d. Semua bayaran dan caj bank, kecuali caj pihak ketiga tidak akan dikenakan.
5. Tertakluk kepada penilaian bank-bank dan syarikat-syarikat kewangan, bantuan-bantuan tersebut adalah dibukakan kepada pelanggan yang masih menghadapi kesukaran dalam aliran tunai. Peniaga dan individu yang terkesan yang ingin memohon bantuan tersebut adalah dinasihatkan untuk menghubungi bank-bank atau syarikat-syarikat kewangan masing-masing bagi mendapatkan sebarang keterangan lanjut.



Pelanggan adalah disarankan untuk mempertimbangkan terlebih dahulu sama ada bantuan tersebut benar-benar diperlukan dan pilihan bantuan yang ditawarkan adalah bersesuaian. Pelanggan yang berupaya untuk meneruskan pembayaran kemudahan pinjaman/pembiayaan secara penuh adalah digalakkan untuk meneruskan pembayaran tersebut agar hutang-piutang tidak terkumpul di masa akan datang.

6. Selain itu, bank-bank akan terus tidak mengenakan yuran dan caj [kecuali caj pihak ketiga] bagi sebarang pemindahan wang yang dibuat oleh pelanggan bank ke bank lain melalui sistem *Real Time Gross Settlement* (RTGS) dan sistem *Automated Clearing House* (ACH) selama enam (6) bulan lagi hingga 30 September 2021. Semenjak yuran dan caj ini ditiadakan pada bulan April 2020, penggunaan pemindahan wang secara *online* oleh pelanggan dari bank ke bank lain telah meningkat. Orang ramai adalah digalakkan untuk mengunapakai kemudahan kaedah pemindahan wang secara digital yang ditawarkan oleh bank dan pembekal-pembekal perkhidmatan pembayaran.

7. AMBD ingin memberi jaminan kepada orang ramai bahawa sektor perbankan di Negara Brunei Darussalam adalah kekal berdaya tahan, kukuh dan mempunyai dana modal yang mencukupi. AMBD akan terus memantau kedayatahan sektor perbankan termasuk bantuan yang dihulurkan pada tempoh bantuan tersebut.

8. Untuk maklumat lanjut, sila hubungi bank-bank atau syarikat-syarikat kewangan secara langsung atau AMBD di 2388388 atau info@ambd.gov.bn.

Autoriti Monetari Brunei Darussalam

Rujukan: AMBD/COMMS/3

Tarikh: 24 Sya'ban 1442 / 7 April 2021